



# Tir Yimyim

www.tiryimyim.in

Regd. No. RNI. NAGAAO/2004 / 13113. Postal-NE/RN-717.

e-mail : tiryimyim@gmail.com

**TAPAK 5** Yangia anidakangma : Tir Yimyim tiryimyim@aolima tir yimyim **TAPAK 8**



**Missionary John Chau indang film  
India nung Dec. 10 nü sayatsü**



VOL. XXI NO. 39 (ADOK 39) DIMAPUR YANGTEPNÜ (THURSDAY) YIMPOKSÜI (NOVEMBER) 16, 2023 ₹ 5.00

## NHRC-i NE nung ken o 40 tema angadangtsü

**Guwahati, November 15, 2023 (Agencies):** National Human Rights Commission (NHRC)-i November 17 nü Northeast state tem nung meimchir temeten aname inyakba ken o 40 tema angadangtsü.

Iba anogo NHRC-i Guwahati nung aliba Administrative Staff College nung camp sitting ka alitsü.

Commission-i November 16 nü ‘Advancing Human Rights through Local Self Governments’ indang national conference ka ayonger ta sangdong ka nung metedaktsü.

Commission-isa anogo ananü semdangdang civil society, NGOs aser press den ajuruteptsü.

Assam, Tripura, Arunachal Pradesh, Nagaland aser Sikkim

## Myanmar Army 2 Mizoram nung arua jenok

**Aizawl, November 15, 2023**

**(Agencies):** Mongulbar nikongdang Myanmar nunger sebai ana Mizoram telungi ait aser tena züngsema Myanmar army aser police 45 tashi Mizoram nung jenokogo.

Myanmar sebai ana ya Zokhawthar police station-i aru. People’s Defence Force (PDF)-i Myanmar Army teseptem atsüngä agiba sülen Myanmar sebai ana ya Myanmar kubok Khawmawi nungi anasatiba yimtsüng Zokhawthar-i jena aru.

Hombar nikongdang Myanmar sebai 40-i international border adena arur Mizoram police ket nung bendanga agütsü. Iba sülen Mongulbar nep sebai ana aru aser nikongdang ano sebai ana jena aru.

Indo-Myanmar arrtsü anüker Assam Rifles ket nung Myanmar sepaitem agütsüogo.

Myanmar sepaitemji

nungi state human rights commissions chairpersons den central aser state sorkar ketdangsürtem national conference nung adentsü ta NHRC-isa metedaktsü.

NHRC chairperson justice Arun Mishra; member- Dr Dnyaneshwar M Mulay, member Rajiv Jain, secretary general Bharat Lal registrar (law) Surajit Dey, joint secretary DK Nim aser tanga ketdangsürtemi national conference aser camp sitting nung adentsü.

Commission-isa Northeast state 8 nungi Chief secretary tem, DGP tem aser tongti ketdangsürtem den sendentem amentsü aser idangji parnoki tuyuba maparen inyakba meyipa reprangdangtsü.

Commission-isa anogo ananü semdangdang civil society, NGOs aser press den ajuruteptsü.

Assam, Tripura, Arunachal Pradesh, Nagaland aser Sikkim

## Naga nunger ka küma longjemtsü alizüng ayutsüla: TR Zeliang

**Kohima, November 15, 2023 (TYO):** Naga nungeri kin telemza aliba agentsü aser ka küma longjemtsü alizüng ayutsüla ta Nagaland Deputy Chief Minister T R Zeliang-i ashi.

Kohima nung Tribal March nung adenertem den jembidang “iba tribal march ajanga kintem tsüngda telongjem aser adianu tangatetba arutsü imlar” ta pai ashi.

Iba sentong ya Tribal Affairs Department-i Jan Jatiya Gaurav Divas benjung nung shilem ka ama ayongzük aser kin balala nungi nisungtem pei pei sobaliba subotsü agir Kohima College nungi Assembly Secretariat tashi jaja.

“Asenoki kin o kin telemza agentsü aser Naga nunger ama longjemtsü alizüng yudi” ta Deputy CM TR Zeliang-i ayongzük.

Union Cabinet-i November

15, 2021 nü Jan Jatiya Gaurav Divas tenüng agütsü. Iba ya nüjiso atema raraba lisopurtem bilemteta tetushi agütsütsü atema amonger.

November 15 ya lisopur lennir Birsa Munda asoba anogo lir aser pa ya Jharkhand nungi liasü. Munda-i British sorkar den lisopur temetentem meyipa bener arutsü atema rara.

Asenoki Independence indang jembidang lennir aika bilemteter saka lisopur lennirtemi shilem tajung agibabo mebilemteter, ta TR Zeliang-i ashi.

India nüjiso atema rara nung Naga nungeria shilem agir alitsü akok saka parnok memeteti dang süidaktsür asütsü. Anungji state sorkari putiotsü bushia record yutsütsüla ta paisa ashi.

Tribal Affairs Secretary Angelina Tajen-i o jembidang Centre sorkari lisopurtemi shilem

agiba agizükba ajanga welfare schemes aika tenzükogo ta ashi.

Iba anogo nung India kubok tesem balala nung lisopurtemi British sorkar anema raraba bilemteter, ta lai ashi.

Munda dak alia nüjiso atema rarer lisopur aika liasü aser asenoka Rani Gaidinliu lir. Lai India nung British yimsüsüba anema noktak, ta Angelina-issa ashi.

India nung lisopurtemi linük yangerba nung shilem agiba dang masü saka sobaliba senmang, tangatetba, linük akhüm wazüka ayuba maparen nunga shilem tajung agiogo ta laissa metedaktsü.

Jan Jatiya Gaurav Divas ya anogo 15 nü amongtsü aser iba nüngtem nung sentong balala aika agitsü. Item ajanga sobaliba, inyaksangshi, achiajem aser arts & crafts sayutsü, ta Tribal Affairs Secretary-isa ashi.

## Chief Secretary J Alam-i AHODS/HODS den senden amen

**Kohima, November 15, 2023 (DIPR):** Chief Secretary J Alam IAS-i November 15, 2023 nü Administrative Heads of Departments aser Heads of Departments den senden ka menogo.

Senden nung Chief Secretary J Alam-i secretariat aser directorate balala nung ketdangsürtem aser staff-i teti mapai arutsü aser “no work, no pay” akangakanga benshütsü metedaktsü.

Paisa AHODs aser HODs dang secretariat department ajak nung attendance jungjunga

reprangsü ayongzük.

Maneni sorkar schemes aser programmes takok ngua inyaktsü atema district officers-i district administration den amalitepa inyaktsü atema Chief Secretary-i HoDs dang ashi.

Nagaland nung APARs indang system tasen ka tenzüktsü aser iba nung Deputy Commissioner temi district ka dak teimba amsema inyakba ketdangsürtem asadangtsü ta paisa ashi.

J Alam-isa department pezünung pilot basis ama e-office tenzükogo saka iba ya tanga department tem

nunga tenzüktsü ta ashi.

Senden nung IT department ajanga services.nagaland@gov.in ta ser online platform tasen indang metedaktsü.

Tanü senden nungsa Statehood Day, Hornbill Festival 2023, temporary PIMS, centrally sponsored schemes aser mapang shitak nung UCs agütsüba indang onüktem benoka lemsatep.

Finance department-ia centrally sponsored schemes atema central aser state share funds indang system tasen ka tenzükba osang metedaktsü.

## US nung züngnertem asoshi lenmang lapoktsür

**Dimapur, November 15 (TYO)**: Küm shia India nungi kaketshirtem lakh dak tali oagi US nung azünger aser tang 2022-23 küm-a India nungi kaketshir ajak agi 2,68,923 züngdagi ta Institute of International Education ajanga adokba Open Doors Report

ajanga sangdonga lir.

US nung züngner India nunger kaketshirtem yaritsü atema US Department of State ajanga India lima tesem trok nung angati len sayuba sentong agir. Item tesemtemji New Delhi, Chennai, Kolkata, Mumbai aser Hyderabad nungbo tesem ana

nung iba sentong ya online nung aser tsüngdong oagia agitsü akoker.

Iba teyari aginer aser US nung züngnertemi parnok website https://educationusa.state.gov.country/in nung reprangsü akok mesüra iOS aser Android ajanga EducationUSA India app agizuka reprangtetsü.

## Dimapur DC-i Viksit Bharat Sankalp Yatra van apusoa yok



**Dimapur, November 15, 2023 (TYO):** Dimapur Deputy Commissioner Tinojongsing Chang-i Indisen nungi Viksit Bharat Sankalp Yatra van apusoa yokogo.

Iba yatra ajanga Centre sorkar indang scheme balala osang prokshitsü aser ajungketsü.

Nagaland kubok teküpoktiba jenjang tashi nung central schemes tajangzük angutsü

atema iba yatra agir ta ta Tinojongsing Chang-i ashi.

Yatra van ajanga district shia block ajak asemntsü anungji nübortemi iba sentong nung shilem agia tajangzüktem agitsü ayongzüker ta paisa ashi.

Indisen yimtsüng nung sentong ka agidang central scheme balala nungi tajangzük angurtemi parnoki ajangshibatem lemsatepa liasü.

Iba sülen Dimapur Deputy Commissioner-i Viksit Bharat Sankalp Yatra van apusoa yok aser mezüng anogo nung Aoyimkum aser Rilan yimtsüngtem semdang.

## ASUD 4 buba Autumn Huddle tenzükogo



**Dimapur, November 15, 2023 (TYO):** Bodbarnep nungi Government Higher Secondary School ground, Nagarjan nung Ao Students Union Dimapur (ASUD) 4 buba Autumn Huddle tenzükogo.

Tanep 8:00 ako nungi asayamung tenzükba sentong tatsüka agidang Dimapur Ao Baptist Arogo Youth Director Sp. Maongtoshi Longshir-i o jembiba sülen asayamung lapoktsü.

Iba sentong nung ASUD Tir Imnatemsu Pongan-i

(Maneni tapak 8 nung...)

## IITF 2023 nung Nagaland State Pavilion semzük



Wanyie Konyak-i November 14, 2023 nü Pragati Maidan, Nagaland House, New Delhi nung Hall No-3 Nagaland State Pavilion semzüksüba noksa angur.

**Dimapur, Yimpoksüi/Nov. 15 (TYO):** Joint Resident Commissioner (JRC), Nagaland House New Delhi, Wanyie Konyak-i November 14, 2023 nü Pragati Maidan, New Delhi nung Hall No-3 nung Nagaland State Pavilion semzükja liasü.

Iba sentong nung Nagaland nungi entrepreneurs 25 tashi oa Handloom Crafts, Handicraft, Wood Craft, Banana Basket

Crafts, state nung yangluba sapon aser osettsüset tajungtem sayua shilem agir.

Taküm 42nd India International Trade Fair (IITF) 2023 ya "Vocal for Local, Local to Global" omen nung ajemdaker ayongzük aser yangji linük 13 nungi exhibitors 3500

jungnüai osettsüset balala sayur. Iba sentong nung partner states ya Bihar aser Kerala lir aser focus states ya Delhi,

Jammu & Kashmir, Jharkhand, Maharashtra aser Uttar Pradesh state tem alitsü.

Iba tesem semzüksüba mapang Nagaland State Pavilion Director, Kikhumthong; Areninla, Asst, Pvilion Director; KuOlie Mere, Dy. Director & Sr PRO (IPR) Nagaland House Delhi aser Thomas Thailu, OSD Planning Nagaland House, New Delhi nungertem dena liasü.

## Governor's Gold Medal Award atema recommendation meshir

**Dimapur, Yimpoksüi/Nov. 14 (TYO):** Republic Day 2024 (January 26, 2024) mapang Governor's Gold Medals aser Commendation Certificates agütsütsü asoshi Home Department, Government of Nagaland ajanga nübu meshir.

Item recommendations ya December 8, 2023 tashinung agütsütsüla aser guidelines yamai alitsü:

1. Annexure-A nung agüja aliba format nung recommended candidates indang osang tejangja a g ü t s ü t s ü l a . Recommendations/citations ya mezung-mezunga aser kaket tapak ka (A4 size) dak tali masütsüla.
2. Gazetted Officers asoshi

recommendations aser citations ya pei indang Head of Department ajanga yoktsüla. Administrative Head of the Department ajanga recommendations/citations nung meyongnem agütsür Special Secretary, Home Department dangi yoktsüla.

3. Non-Gazetted Staff asoshi recommendations/citations nung Head of Department-i meyongnem agütsür indang-indanga Special Secretary, Home Department dangi yoktsüla. Police, Home Guards, Prisons aser Fire Services nung inyaker asoshi recommendations ya pei indang Director Generals/
- 4.

Heads of the Department ajanga agütsütsüla.

5. Recommendations/citations ya Special Secretary, Home Department atongtsüla.
6. Recommendations/citations nung recommending authority ajanga meyongnem agüja aliba hard aser soft copy tem den Annexure yoktsüla.
7. Deputy Commissioner temi NGOs, kija, aser pei Establishment nung inyaker asoshi recommendations agütsütsüla. Item recommendations ya Commissioner, Nagaland ajanga meyongnem agütsür Special Secretary, Home Department dangi yoktsüla.

## GHS Lengrijan nung Cultural cum Children's Day amung



Government High School Lengrijan, Dimapur nung November 14, 2023 nü Cultural cum Children's Day amungdang Class 10 nung azünser temi 'Cultural fusion' ken atendang tangokba noksa ka yangi angur. Iba school nung kaketshir 500 dak tema azünger.

**Dimapur, Yimpoksüi/Nov. 15 (TYO):** Linük ajunga den külemi Government High School Lengrijan, Dimapur nunga November 14, 2023 nü Cultural cum Children's Day munga liasü.

Iba sentong ya Imty Ao ajanga sarasademer tenzük aser Class X nung azünger temi Cultural fusion (sobaliba ken temeyokte) ka aten aser liasü.

kaketshirtem nungisa Poutoa Newme aser Leukang Newme nungeri Zeliang nunger tsüngsang ka agi shilem agi aser Ganga Thapa-i Nepali classical dance ka ajanga shilem agia liasü.

Iba sentong nung menden Lurachetla ajanga tanurtem anogo terat ashi aser tesayur tebur temi temeja ken ka tena liasü.

Sentong nung maneni tesayur aser kaketshir temi shilem balala agia iba anogomung longsolongbena aser pelatepa munga liasü aser Sussie-i sarasadema sentong tembangba sülen lokti chiyongba mapang agia liasü.

Iba sentong nung kaketshirtem aser tesayurtem pei kin indang sobaliba sübosolemtsü agir arua dena liasü.

## OFFICE OF THE YAJANG 'C' MEDEMSANGER VILLAGE COUNCIL

P.O - MANGKOLEMBA B.P.O LONGCHEM  
DIST: MOKOKCHUNG: NAGALAND

Reference No. ....

Date: .....

### NO OBJECTION CERTIFICATE

This is to certify that Smti. Akuminla, daughter of Mr. Imsujungba is a faithful citizen of Yajang 'C' Village. The village council do hereby has no objection on appointing her as a Chowkidar against the vacant post (Grade IV) at Yajang 'C' Village under the establishment of Chief Veterinary Office Mokokchung, Nagaland.

The council authority has further recommended that there is no objection towards civil administration and customary law. It is our prayer that she will continue to maintain obedient and clean life in the days to come.

*(I. YAPANG JAMIR)  
Village Council Chairman  
Yajang 'C'  
Chairman  
Yajang 'C' Village Council*

## OFFICE OF THE YAJANG 'C' MEDEMSANGER VILLAGE COUNCIL

P.O. MANGKOLEMBA B.P.O LONGCHEM  
Dist: MOKOKCHUNG: NAGALAND

Ref. No. ....

Date.....

### MEYIPA AGIR

Yajang 'C' Veterinary Department nung Chowkidar Post (Grade IV) atema Smt. Akuminla D/o Mr. Imsujungba, la ya Yajang 'C' senso aser yimtsüng nungi masü, saka ni la nem No Objection Certificate, Date: 31/05/2023 anogo nung agütsü. Ibaji Council-i memeteti ni recommend agütsü nung tanü ni meyipa agir.

*(I. Yapang Jamir)  
Chairman  
Yajang 'C' Village Council*



Assam Rifles temi Nagaland Police den lungjemer Mokokchung district kubok Mongsenyimti nung operation ka agidang NSCN (KYA) züngsem ka apu. Iba nisunba ya 2007 nungi kanga yakyaka aru aser tashiyim amshia senotsü meshiba maparen balala nung shilem agia liasü. Ken o maneni bushisüngdangtsü asoshi iba nisunba ya police nem agütsügo.

## Ungma nung 'Hamara Sankalp, Viksit Bharat Yatra' tenzük

**Dimapur, Yimpoksüi/Nov. 15 (TYO):** Mokokchung district

kubok Ungma yimdak District Administration-i anir November 15, 2023 nü "Hamara Sankalp, Viksit Bharat Yatra" tenzükka liasü.

Iba sentong nung tongti tesemdanger ka ama Ao Senden tir Chubawati Longchar-i anir Viksit Bharat atema tenangzükba züngtepa liasü.

Sentong mapang teyari angurtem nungi tajangshiba lemsatepa liasü. Onchenna SHG nungi Alila-i Outstanding Achievers Award angu.

Iba sentong nung sobaliba tsüngsang balala ajanga sentong tali mera ketdaktsü.

Iba sentong ya EAC (Hq) Vitolu lenisüba kubok agi aser Assistant Commissioner and District Nodal Officer Mokokchung, Ajit Kumar, IAS ajanga iba Yatra indang rasaa ashi.

Nüburtem den tesendaktep tali tajungba kumdaktsütsü mechibla sentong nung cooperative sector temi stalls amenoka liasü.

Iba sentong semzükba sülen Khensa indang Community Hall nunga kasa sentong ya agia liasü.

## Dimapur-Kohima 4 Lane Package 1&2 semdang


**Dimapur, Yimpoksüi/Nov. 15 (TYO):** Chümoukedima District

Administration nungi ketdangsürtem aser NHIDCL (National Highways and Infrastructure Development Corporation Ltd.) ketdangsürtem lungjemer November 15, 2023 nü Dimapur-Kohima 4 Lane Package 1&2 nung shilem ka ama Dimapur Bypass, Chümoukedima aser EPC contractor tem den Section semdanga liasü.

Hornbill Festival nüklä nung Deputy Commissioner, Chümoukedima, Abhinav Shiva, IAS den Thejavizo Nakhro (RO) nungeri iba tesem ya semdang.

Dimapur-Kohima 4 Lane lenmang nung arok-apa (pothole) malitsü asoshi parnoki General Manager (P), Dmp-PMU, NHIDCL, Authority's Engineer aser EPC contractor tem den jembia liasü.

## Ato kilonser Modi-i PM-Kisan kübok sencrore 18,000 agütsü



November 15, 2023 nü Khunti district nung Ato kilonser Narendra Modi aser Jharkhand Chief Minister Hemant Soren na Jharkhand Foundation Day sentong nung adendang tangokba noksa nung angur.

### New Delhi/Khunti, Yimpoksüi/November 15

(Agencies): Bodhbarnü Ato kilonser, Narendra Modi-i linük nung aluyimer crore 9 dak tema nem PM-Kisan scheme kübok sen crore 18,000 agütsüogo.

Jharkhand kübok Khunti district nung Janjatiya Gaurav Diwas anogomong sentong nung Modi-i 'button' ka nung nema senji digital ajanga aluyimertem indang bank accounts nung inoktsü.

Pradhan Mantri Kisan Samman Nidhi (PM-Kisan) scheme ya aluyimertem aluyimba aser nüngdak balala nung amshitsü atema senotsü teyari agütsüba scheme ka lir.

Iba scheme kübok küm shia aluyimertem nem sen 6,000 agütsü aser ibaji shilem asem

küma kasasa lemsar agütsü.

Ato kilonseri iba scheme kübok Bodhbarnü aluyimertem nem sen agütsüba ashishia Congress-i, Chhattisgarh aser

Madhya Pradesh na nung assembly election agitsü anogo ananü dang lia sen agütsüba ya metetsümonga inyakba masü no?, ta asüngdang.

Madhya Pradesh nung kenüyongi November 17 nü election agitsü aser Chhattisgarh nungbo election mezünguba shilem November 7 nü agiogo aser tanabuba shilem Nov. 17 nü agütsü.

Congress general secretary in-charge of communications, Jairam Ramesh-i Hindi oshi agi X ajanga, PM-Kisan Samman Nidhi instalment trokbuba

August 1, 2020 nü agüja liasü

aser 9buba August 9, 2021 nung agütsü, ta metedaktsü.

Paisa, instalment 12buba yaküm October 17 nü agütsü, ta metedaktsü.

"PM-Kisan instalment 15buba tanü November 15, 2023 nü agütsü. Chhattisgarh aser Madhya Pradesh nung anogo ana dang lirbo election agitsü, Rajasthan nung anogo 10 aser Telangana nung anogo 15 lir election agitsü, aser tanü instalment 15buba agütsü.

Menoa magütsüi lir tang agütsüba ya metetsümonga inyaker masü no?" ta paisa asüngdang.

Rajasthan nung election November 25 nü agütsü aser Telangana nung November 30 nü agütsü aser December 3 nü vote azüngtsü.

## Jammu & Kashmir nung bus ka tsükokba lendong nung nisung 36 asü

Srinagar, Yimpoksüi/ November 15 (Agencies): Bodhbarnü Kashmir kübok Doda district nung Himalayan highway ka nung bus ka lungreni lua tsükokba lendong nung nisung 36 asü aser 18 yiruogo, ta kettangsertemi metedaktsü.

Menden 42 aliba passenger bus ji Kishtwar jila nungi Jammu-i aoba mapang nung lungreni süklep 660 lua tsükok, ta sorkar kettangser Harvinder Singh-i metedaktsü.

Iba lendong atalokba sülen anasa alirtem aser kettangsertem iba tesem jagi oa kümkükba maparen inyakba aser yiru alirtemji anasa aliba health facilities-i anir ao; nisung pezübo kanga mejungi yiru Jammu-i anir ogo, ta paisa metedaktsü.

Bus ji kechi kuli ajanga tsükokar memetet, ajistiaka bus nungji nisung tali liasü aser gari anisangi gariji kanga kera ani, ta police officer, Sunil Gupta-i metedaktsü.

Iba lendong atalokba kuli jangjatsü atema bushisüngdangtsü tuyuogo.

Iba osang angashia Ato kilonser, Narendra Modi-i X ajanga takoksa angur kibongtem den mangyim jashi lemsatep.

Paisa asürtem shia kibongtem nem sen lakh anana tejen aniba densema lir.

50,000 agütsü, ta sangdong.

Linük Tir, Droupadi Murmu ia X ajanga, "Jammu & Kashmir kübok Doda district nung tia makai bus lendong ataloka nisung aika asüba osang angashia jashir. Mangyimer kibongtem den ni mangyim jashi lemsateper aser yirua alirtem tekeraba nung aneptsü sarasademtsür," ta metedaktsü.

J&K Lieutenant Governor, Manoj Sinha-i X ajanga, "Assar nung bus tsükokba lendong nung nisung aika asüba osang angashia jashir. Ni mangyimer kibongtem den tejashi lemsateper aser yirua alirtem tekeraba nung aneptsü sarasademtsür," ta metedaktsü.

Paisa divisional commissioner aser district administration dang akokba tashi iba lendong nung takoksa angurtem anepalua yariang, ta tuyuogo.

Alima nung gari lendong teimtiba atalokba linüktem rongnung India densema lir; küm shia India nung gari lendong aika ataloker aser nisung jenti asür. Lendong atalokba tongti kulitem rongnung gari mashie aniba, yi jemer aniba aser gari kanga tejen aniba densema lir.



November 15, 2023 nü Jammu & Kashmir kübok Doda district nung bus ka tsükokba sülen tangokba noksa nung angur. Iba lendong nung nisung 36 asü aser 19 yiru.



**State Bank of India**  
STRESSED ASSETS RECOVERY BRANCH, JORHAT  
Na-Ali, M G Road, Jorhat, Opp. ASEB Building, PIN-785001 (Assam)  
Tel No : 0376-2300193 / 2300204

### KIOJEN AGIBA NOTICE

[Rule - 8(1)]

(for Immovable property)

Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaiker tsünglanglen sign súa aliba State Bank of India officer-i 09.06.2023 anogo nung Demand Notice ka ajanga sen apur M/s. Juniors Hub, Proprietor Smt. Merenila dang notice agütsüba anogo nungi tenzüka anogo 60 tsüngda notice nung shia aliba ama 01.06.2023 tashi nung adokba sen 49,18,239.44 (Rupees Forty Nine Lakhs Eighteen Thousand Two Hundred Thirty Nine and Forty Four Paise only) den 02.06.2023 anogo nungi tenzüka sen temelok aser incidental expense den cost balala atema sen agüjung, ta tuyu liasü.

Ajisüaka sen apuri senji magütsüt nung sen apur/Guarantor aser nüburtem dang tsünglanglen sign súa aliba Act kübok Section 13(4) aser Rule 8 nung agüja aliba tashi amshia 2023 küm November 10 nü tsünglanglen shia aliba kiojen agiadokogo, ta sangdonger.

Sen apur/Guarantor aser nüburtem dang iba kiojen dak sendakba nung kecha inyaksangshi masütsü metedaktsü aser kari danga tetuyuba anema inyakra **State Bank of India**-i sen 49,18,239.44 (Rupees Forty-Nine Lakhs Eighteen Thousand Two Hundred and Thirty Nine and Forty Four Paise only) den 02.06.2023 anogo nungi tenzüka temelok den incidental expense aser cost atema meshtüsü.

Sen apur dang iba Act nung Section 13 kübok sub-section (8) nung aliba ama mapang shidak nung item kiojen alangzüksü atema inyaktsü metedaktsü.

### Kiojen osang tejangja:

Dr. Aotoshi, S/o, Natwar Thakkar (Guarantor) indang kiojen ajak Darogapather, Dimapur, Nagaland nung Mouza No.03, Patta No.267, Dag No.174/416 kübok aliba ali 02 Bigha den yangji aliba ajak, aser iba kiojen ya item yagi longbanga lir-

North tsütsülen : Approach Road, East tsütsülen : Shri Imtineren kimong, West tsütsülen : Shri Imtineren kimong South tsütsülen : Gandhi Ashram kimong.

Anogo : 10.11.2023

(S/d AUTHORISED OFFICER)  
STATE BANK OF INDIA



November 15, 2023 nü Parliament House complex, New Delhi nung linük tatong Tir, Jagdeep Dhankhar aser Lok Sabha Speaker, Om Birla nati Bhagwan Birsa Munda nem akhüm agütsüba sülen folk artists den külemi shilem agiba noksa nung angur.



# TIR YIMYIM

## YIMOBILEM (EDITORIAL)

DIMAPUR YANGTEPNÜ, YIMPOKSÜ (YIMPOKSÜ) 16, 2023

### Asenoka Kisama ka yangludi !

**N**agaland tesem ajak topur tajung arem, ayong aser tenem agi meketbanga lir. Ano, idakji bendenloka nisungtema topur aser sobaliba tajung agi sünga lir. Alima nung Naga nungersa tajungba aser ano Naga nungertem rongnunga Aotsür Aorsa tajungba, kechiyong parnok dak aketba temeim aser awashiji kecha jenjang dena medemdangtsü makok, kati ka angati yariteper aser aiener dang akümtsübu sayur aser akok tashi angati yaritsü meranger. Ibai asenok dak aketba sempet tajungtiba aser tashi tulutiba asütsü. Item sempet aser sobaliba tajung agi sen akümtsübu putuji tanü putu ya lir. Iba tangatetba nung Nagaland government-i Kohima anasa Kisama yim tasen kümteta küm shia Nagaland nung alir Naga kintem ajak sentepdaktsür hornbill benjong amonger. Anungji, Kisama ya Naga nunger ajak meyong yim lir. Atangji, Kohima nung Nagayim ka kümteta alima bendang semer nungi raliwalirtem adenshia iba benjong amunger asünungji, Naga nunger ajak ajangzüker saka Kohima nung alirtemsa tajangzük tuluba angur. Aji oda, benjongbo Kisama nung amunger saka benjong reprangi arur raliwalirtembo Kohima aser temeket nung 'hotel' aser 'homestay' nung anener aser Kohima o Kisama na tsüngda nübortem oli aruli jajaba nung bus aser taxi garitema sen aatsü mapang tajung angur. Joko, taküm küm-a hornbill benjongmung nenjunga arur asünungji Kohima aser Dimapur nung dena aener anendak 'hotel' aser 'homestay' ajak jelia asüngdanga yumadagi aser Kisama nung pei pei kin meyong ki yanglúa alidak chiyongtsü aser osettsüset anogo ter nü yoka amungtsü atema renemdagi. Ibai Nagaland nung benjongmung rongnung tetsütiba kümogo aser alima tesem balala nungi iba benjongmung nung Naga nungertem yartsüngsangba, kentenmenüba aser chiyongkiyongba repranga shilem agir aotsü asoshi nisung lakh junga senteper. Yaküm 2022 küm, Covid wara sülena, iba benjongmung nung adentsü atema Naga nunger nisung 90,860, India tesem balala nungi arur nisung 48,413 aser bendang limatem nungi arur nisung 1,026 liasü. Takümbo iba dang nungi teimba arutsü teimla nung sentong tapu balala renemdagi. Item aenertem anendakji Kohima aser Dimapur nung aliba hotel kisüng agi meperir aser ano raliwalirtem aikati akhi ainlen jajaba yimya dang amshia hotel nung masü saka lisopur kidang külemi mesüra peisasa soruchioka chiyongdak tesem kar nung sademsadema anenzüka monger oner. Ibayongji, tanü asüngbo homestay inyakyim ya tesem ajaklen tenzüka aoer. Homestay tetezü 'kidang anenzükba' ta angatetdi, anungji pei kidang kinungertem den külemi amunger amai amungtsüa town nung dang masü saka yimtak yimtsüng nunga renemer, kechiyong raliwalirtem aikati yimtak yimtsüng aser alu nungang monga kazür onür. Item kidangji peisasa soruchioka chiyonga amongtsüa akok, mesüra kiburi Naga nunger mesüra Aor chiyongtsütem dena renema chiyonga jema mongdaktsüsa akok. Tanü asüng pei ki agi aener anendak 'homestay' kümber yamaji senotsü ajangzüker. Item 'homestay' kitemji alima nem Airbnb aser website balala ajanga metedaktsür, anungji parnok marudang jelia asen kiji asüngdanga yur arur. Item temoatsü aser tajangzüktemji asenoki Mokokchung nunga agitetsüsa asenoki Mokokchung district nunga Kisama ama Arokyim ka mesemteta asenoka benjongmung ka amongtsüsa sentong yanglutsü junger. Iba Arokyimji Mokokchung district nung tesem tajung ka repranger Tourism mesüra Tribal Affairs ministry ama ajanga Aor MLA-tem teyari agia Ao Senden ama telongjem kati mesemtet akoktsü. Iba Arokyim nung benjong amongi arurtemji Mokokchung town nung dang masü saka Ungma, Longsa, Longkhum nungi tenzüka luagi Khristian yimsü tenzükdak Molungkimong aser Molungyimse tashi nung lua anenzüker Ao lima repranga jajadang Aor sobaliba tajung angazüka monger aotsübaji raliwalirtem atema tanitebelema memetet aser senotsü aser mapang endoka langa arur aoer asütsü.

## OLEMSABANG

Tesüiba Putu-i Inyaka Yutsüba lemtet tem Meputeper ya metemdanga meyiba Reprangshidangtsü koda

- T. Imti Jamir

(*Yashi adok nungi...*)

### I. Molungyimse Arogo-i Mungdang dangi abenba onük tongtipang kar telangzüba agütsür.

- (1) Süpongmeren: P.T. Philip aser L. Yadeni Süpongmeren baptiba indang parnok kaket nungzülusemaka Original documents mangur, aser Nokinketer Mongchen nunga pa baptibamangur ta shia ali nung pa baptibaji mejangjar (NMP 40)
- (2) Imnameri: 1879, 19 Nov. nung pa Arogo nungi atsüng, 1892 Feb. 28 nung pa membertransfer adok ta Molungyimse Arogo report 29-9-80 RCA-i tuyuba lagi Molungyimse-i aitta jangjatsür.
- (3) Imlichiba: 5 buba RCA-i ashiba ama pa 1876 Molungyimse-i ao, aser 1892 nungbo Molungkimong transfer asü.
- (4) Imnapokyim: Par chirnur Molungyimse nung tanü tashi lir ta ashi nungji Molungyimse nüü ta angateter. Saka Nokinketer Mongchen, Olemjungbai züluba Ao Khristian Tetenzük Otsü. 1838-1896 item nunga taiba tenüng shisema mali (Ref.NM PP,39,48. Olemer P.22)

### II. Zülua aliba o-tem (Documents)

- (a) Mezungbuba nung Molungkimong yimdak Dec 23, 1872 nung asen Ao llima (soil)nung Arogo tenzük. Saka kodang Dr. E.W. Clark-i anir oa Molungyimse Oct. 24, 1876 nung yim tasen ka aküm, idangji Molungkimong Arogo ka toktsüba tejangjamangur, aser iba Arogo 1892 nung tanaben küm tenzük saka ajia 1896 nung loksa aser Molungkimong Arogo yabo 1919 nung tenzükba metangdangi aruba Arogojilir. 1940 nung Ao mungdangi tasüngdangba yokba nunga telangzüba agütsüba nung Molungkimong Arogo-i par Arogoj 1919 nungi tenzük ta langzüba kuliji angur.
- (b) Tanabuba nung Molungyimse Arogo Molungkimong yimdak Dec 23, 1872 nung jitenzük ta angateter. October 24, 1876 yabo yim tasen ka Molungyimse aküm ba danglir. Dec 23, 1872 nung tenzükba Arogoj amangbapur yim tasen akümdangji bener ait, saka Arogo taküm, tamang mepetmesü kar ajanga iba Arogo August 19, 1894 nungken loksa aser tenzükshi. (19 th August 1894 on Sunday) "At the Morning preaching service was a church meeting and under the instructions of Rev. S.A Perrine and Haggard the Molung Church disbanded" Sd/- E.W.Clark (Vide Kijung's collection-Naga Missison and church Record by E.W Clark. Further see The Mighty Work of God by F.S. Downs P.115. Baptist Mission in Nagaland by Joseph Puthen Purakalpp 108-109 etc)

Anungji tanü aliba Molungyimse Arogo ya 1894 nung tenzükba jiang metangdangi aruba Arogoj lir. Kechiaser August 1894 anogo ka nung dang süaka Arogo- ken anendaktsü (Disband asü) aser gondha ishika lirang Arogoj tenzükshi nung tang aliba Molungyimse Arogo ya 1894 nung tenzükba Arogo ta kuli shiteter.

### III. Tangatetba agütsür:

Arogo otsü maparen dak sendakba nungi adokba ken o (case) ama Mungdang mesüra kija Arogo shingaia mejembitsü, nüngdakra zülua aliba kuli o (documents) bushiteptsü akok. Committee-i osang bener aruba ama Mungdangi agizüka ayu, aser iba ken o nungmungdangi kecha shilem (Responsible) magitsü ta lemtet.

#### Note:

Idaki tongtibang documents kar dang yoker. Ajaki 30th April '97 nung jembitsü jungjunga zünger arutsü mepishir

Kibubar wadang nung  
Sd/- Rev. L.Kari Longchar.  
Executive Secretary.

Molungkimong Arogo atema Record tejangja bushitsü Research joint committee ABAMnungi 6 Aser Molungkimong Arogo nungi nisung 6-i (Ajak agi nisung 12 agi) aküm ba Report nungi ABAM Executive Committee-i lemtetba yamai agütsür.

Research Committee-i bushitetba otsü aser records den medemdanger tebang otsükuli kobai zülua aliba record den meputeper itemji entoker tebang agi bendena ashiba otsü aser zülua aliba record kobasa putepa atoker item den teküpok agüja aliba kulitem agi ABAM Executive Committee-i yamai lemteter.

(*Maneni asüng adok nung...*)

Iba Olemsabang nung lemsaba ken-o aser shisatsü ya iba ocet zürlü  
bilemba ken-o ama tazüngeri angateta agitsü mepishir

## Missionary John Chau indang film India nung Dec. 10 nü sayatsü



John Chau

Sentinelese tribe

**Port Blair, Yimpoksüi/ November 15 (Agencies):** November 17 nü sayatsü aser India nung December 10 nü sayatsü. Iba film yanglurtemi pai iba asetkong atongtsü asalentong yangluba tejanga iba film nung shia lir.

Küm pongu tejaklen America nunger missionary Chau-i Bay Islands nung aliba Sentinelese tribal nisuntem ajurua parnok den Khrista osangtajung lemsateptsü meranga liasü, ajisüaka item nisuntem jagi pa khaset.

John Chau indang taküm otsü film 'The Mission' ji Amanda Mcbaine aser Jesse Moss nati direct asü aser Simon Chinn o Jonathan Chinn nati produce asü.

Osangbener den jembidang National Geographic Channel nung senior director, Marcus Cammack-i, "Iba film (The Mission) ya Amongnü, December 10 aonung 10:00 aonung National Geographic Channel nung sayatsü," ta metedaktsü.

2018 küm missionary Chau-i lisopur Sentinelese nungerem ajurua parnok den Yisu Khrista osangtajung lemsateptsü meranga liasü, ajisüaka pa iba asetkong atongba sülen item nisung jagi pa lasang agi khaset.

Sentinelese nisuntem ya Andamanese nisuntem lir, saka tribal telok balaka lir, aser tanü tashi shingaia parnok den tongtepratep mesüteter.

US nungbo 'The Mission' ya theatre kar nung sayaogo. UK aser Ireland na nung

nung alirtem jagi meimchirtem den tongtepratep kecha mesüi parnok kija alir.

Pa asübaji shingaia tenük agibo mangu, ajisüaka asetkong nung alirtemi tzüyimkümen tasümanang ka arembaji angopur kati ngua liasü. Anogo ishika lir angopurtemi pa temangji abeni aoba sülen ang tasümanang jangja liasü.

Pa asetkongji tonga maodang pai par kinüngertem dangi züluba shidi ka pai angopurtem ket nungji yuja liasü. Shidi nungji pai yamai zülua liasü, "Iba asetkong nung Yisu yimli amenoktsü atema ni iba asetkongi aoer. Ni asiyonga yangji alirtem nem tai tetongloksü."

Paisa, "Nenoki ni sowar ta bilemtsüa akok, ajisüaka item nisuntem dang Yisu indang lemsateptsü dalang, ta ni bilemer. Ni tepsetyonga parnok dang mesüra Tsüngrem dang tejashi. Ajisüaka Tsüngrem tajaba tashi anga nenok taküm liang.

Asenok ano tanaben ajuruteptsü. Item tribal nisuntem tatembang maka taküm ajangzüktsüji tongtibang. Jungkai Adok 7:9-

10 nung shia aliba ama Tsüngrem Chuba menden longbanga parnoki pei oshi agi külemba reprangtsü ni matateter," ta zülua liasü.

"Ni nenok ajak meimer aser nenok ajaki Yisu Khrista nung alirtem jagi tzüküm tonga dak alaka iba lima nung arur nisung tasen aika temeimtiba kecha malitsü ni khasetogo. Tesüiba küm sarasademsür," ta pai shidi meyirjang aika iba asetkong nungji shia lir.

Tamalen-a iba asetkong nung alirtem jagi tzüküm tonga

dak alaka iba lima nung arur nisung tasen aika temeimtiba kecha malitsü ni khasetogo. Tesüiba küm sarasademsür," ta pai shidi meyirjang aika iba asetkong nungji shia lir.

**ICC-i Egypt nung Khristantem reshikangshibare report metedaktsü**

**November 15, 2023:** reshikangshir, ta ICC-i International Christian Concern (ICC)-i Egypt nung tesüiba küm meyirjang aika Khristantem aliba aser linük nung akhidang nungi tang tashi Coptic Khristantem reshikangshia aruba osang tejanga metedaktsü.

Egypt nung Aso 20 jungnüa Coptic Khristantem reshikangshia arur aser tanü tashi iba linük nung parnok

## ANOGO ABEN TSÜNGREM DEN

### Tanelagagi sünga liang

Efesa 5:18

Tanelagagi sünga alibaji ochi lir aser ibaji sayutsüngirengi dang aliba arogo ka samadoktsü lendonga lir. Iba tanelagagi temeshi nübu aser Pai tenzükba mapa nung mejangjaba ajanga adoktsü akok. Putu ka shi tesayurtemi O tetezü nung ammeter tamanger taküm nung tanelagagi temeshi mapa sayu. Kari tamangertem dak tanelagagi temeshi-i mapa inyakba Laien ochibaji tai ratettsü. Nübusen aser tanelagagi temeshi mapa indang sayutsüngibaji nüngdaka lir. Laien tesayuba nungi pa mapa indang ratettsütenüngdaktsü lir. Tanelagagi temeshi mapa kanga küm danga ratettsü tenüngdaktsü.

Tanelagagi sünga alibaji kar nem dang sempet balaka agütsüba masü, saka ibai tamanger ajaki anogo shia mapa nung metetta alitsüba mapa lir. Tekümtet agizükba mapang Tanelagagi temeshi tamanger shia dangi aita alir. Tamangi Khrista dak lidaktsür aser kangki nung Pa mapa aser Pa shia arubaji tanelaren temoatsütem kimong lir. Tsüngremi tekümtet mapa inyakba nung tongtipang kaj Tanelagagi temeshi yokbaji lir. Shiba dak tanelagagi mali, paji Khrista meyong masü ta Pauli Rom 8:9 nung zülu.

Tanabuba, Tanelagagi temeshi mapajji tasen tamangertem Khrista temang nung baptitsüba lir. Alima ajunga nung amangba ajanga iba mapa maneni ataloktsür. Ibai ajunga tamanger ajak Khrista temang Kibuba Yisu den lungjemdaktsür. Kodang iba mapa ataloktsür tamangertem meshitetsü aser Tsüngremi kibong nung tenzüker akümtsü tekümtet temaitsü ajener.

Kodang tamanger dak Tanelagagi temeshi nem teti talidak agütsüdir, iba nisung mapa ajak Pai azüoktsü. Sünga alibaji tamanger mapa nungi adoker. Mezungbuba, temenen nungi temulung meyipba. Tanabuba, ni kechi ajak bendanga agütsüa Tanelagagi temeshi-i azüokdaktsüba. Tasembuba, Tanelagagi temeshi-i Tsüngrem tenangzükbatem atalokdaktsüba metetta Tsüngrem nem tenüngsang agütsüba. Pezübuba, Tanelagagi temeshi shibai kük taküm sünga lir paki kük telemtetba aser mapa ajak azüoker ta amanga tamang agi inyaktsüla. Iba nungi adokbaji Tanelagagi temeshi ajanga ain aser Khrista adenba tejangga nung Tsüngrem mapa inyaktsüla.

## Khristantem teimbakati AI ya Arago atema majung ta bilemer

**November 15, 2023:** Pastor temi sayutsüngitsü atema artificial intelligence (AI) amshitsü shisadangba mapang ka nung Barna-i agiba survey ka ajanga, Khristantem teimbakati AI ya Arago atema majung ta bilemba bushitetogo.

Taküm July 28 nungi August 7 tashi nung Barna teloki Gloo den senteper agiba survey nungji US nung tain survey-i shilem agia telangzüba agüja liasü.

"AI ya Arago atema junger" ta asüba nung Khristantem teimbakati aikaru makar. Survey nung shilem agir shilem 30-i AI ya Arago atema kanga majung ta ashi, shilem 21-i AI ya Arago atema majung ta ashi aser shilem 27-ibo memetet, ta ashi.

Khristan shilem 6-i dang AI ya Arago atema junger ta ashi aser shilem 16-i AI ya Arago atema junger asütsüa akok, ta ashi.

US nung taintem teimbakati

parnoki tang tashi AI junga memetet ta ashi; shilem 10-i dang parnoki mapa mesüra nije business atema AI amshir, ta ashi.

US nung tain shilem 29-i "Ni AI dak melung malemer" ta ashi, shilem 35-i "Ni AI indang metetner" ta ashi aser shilem 21-i "Ni AI indang angazüksü jangrar" ta ashi.

Taküm küm tetenzüklen Gloo-i agiba survey ka ajanga bushitetba agi, Arago lenirtem shilem 63-i parnoki AI indang angateta lir ta ashi, shilem 28-i AI indang tera meteta lir mesüra khenyongi memetet ta ashi aser shilem 9-i dang AI indang junga angateta lir ta ashi.

Arogo lenirtem shilem 62-i parnoki pei mapa nung AI mamshir ta ashi, shilem 19-i khenkhen amshir ta ashi aser shilem 19-i hopta shia mesüra anogo shia khen amshir, ta ashi.

Arogo lenirtem shilem 54-i, Arago nung AI amshiba atema tebilemtsü akar, ta ashi.

**AO OSHI ANGAZÜKDAK:**  
**TANÜ ANGAZÜKTSÜBA OJANG**
**Sempa**

(v) maginü, mokokaji (hate)

\* Yihuda nungertemi bendangertem kanga sempa.

**Sempak**

(n) alu jen kilem tapak ka dang yangluba ( flat farm house)

\* Ozü lu nung sempak dang tilaka yangluba lir.

**OLONG PAITEP # 6617**

	1			2	3			
4			5				6	
					7			
	8							
9			10		11			
				12			13	
14								
				15				

**TIPLÉN**

TIPLÉN	LANGTSÜNGLEN
2. Süjeplok	- (4)
4. O agi merenshi	- (5)
7. Ayongküm li	- (5)
8. Chiyungtsümapang süiadok	- (4)
9. Tsüngrem den jembiba	- (9)
12. Saklok	- (4)
14. Samaba mebushitet	- (5)
15. Mejanga onü	- (5)
16. Tzü shiruru ka	- (4)
OLONG PAITEP # 6616 TELANGZÜBA	
TIPLÉN :	LANGTSÜNGLEN :
1. Semtu, 3. Lepko, 5. Bilem,	1. Sayu, 2. Teb, 4. Kimong,
8. Ulu, 10. Tsüngpang,	6. Lungkak, 7. Milak,
11. Tesangwa, 13. Aoksa,	9. Zunga, 10. Temopu,
15. Putir, 16. Yipru.	12. Walu, 14. Ali.

**KHEN SHISADANGDI****AROGOPURTEMI ALOKBADANG MEJANGJABA OLEN KA ASÜNGDANG**

- Arogopur** : Ohoi...Alokba...Onoki mejangjaba aser mangatetba olen ka asüngdangdi... Angazükba agi Clerk Theological College ya mezüng tenzükangbo Impur nung tenzük...ta angazük... Aji shidak asü masü...???
- Alokba** : Hau-ja... Nia yamaji angazük...Anungji aji shitak asütsü südi...ta bilemer.
- Arogopur** : Saka küm ishika sulen jika agi mesademba agi CTC-ji Aolichen-iang belena bener atau...ta angazük...aji shitak asü masü...???
- Alokba** : Hau-ja... Nia yamaji angazük...Anungji aji shitak asütsü südi...ta bilemer.
- Arogopur** : Sürabangla....CTC tenzükter küm -50 ajungba Hon Jubilee amungtsüba atema CTC tenzükba anogo aser kümji...Impur nung tenzükba agitsü asü..Mesura Aolichen nung kimong tasen lepteta mesemba anogo aser küm-ji agitsü...???
- Alokba** : Waaa....!!! Mezung Impur nung tenzükba anogo aser küm-ji agitsü adi...Impur nungji jika mesademba agi jika tesademba ka bushia... Aolichen-i aoba dang... Saka Aolichen nungji CTC-ji tabanen tasen tenzükshiba masü.. kasa CTC - to Office songjenji belena bener oa...Jaka tasen ka mesemba dang nung koda...?? Anungji Impur nung tenzükba anogo aser küm-ji dang agitsü adi...Ajisüaka, iba nungji tangatetsü ka lir... CTC tenzükba otsü nung... Impur nung tenzük...ta asüba ji kecha küli agia aitoktsü makok...Tetenzükba jika-jibo Impur-jisa asütsü.
- Arogopur** : Oooooooh....!!! Hau tang-jiang angajemogo...Kecha mangmangtsü malia...!!!

Lilir ~ L. Kika Pongener.

**NAGALAND CONSERVATORY OF MUSIC***Presents***Les Miserables**

ANOTHER DAY, ANOTHER DESTINY



NOVEMBER 2023

23rd Rs. 5000 Admit 4

24th Rs. 2000 Admit 2

25th Rs. 2000 Admit 2

VENUE  
LORIN HALL, TETSO COLLEGE

INFORMATION &amp; RESERVATION

+91-7630-803977+91-9366239275

Supported by:

**Manipur State Journalist Awards atema nisung 8 shim****Imphal, November 15, 2023****(Agencies):** Directorate of Information & Public Relations (DIPR), Manipur-i State Journalist Awards 2023 angutsüpurtém osang metedaktsüo.

Tetendanger telok kati pei pei yimoziürtem tenüng agütsüba journalist tem indang press/video clippings repranga liasü. Parnoki agütsüba osang aser kulitem reprangdanger tetendangertem journalists 7 nem Manipur State Journalist Awards 2023 agütsütsü shimitet ta DIPR-i ashi.

Sanaleibak Daily nungi staff

reporter Robinson Wahengbam nem rural reporting category aser Sanaleibak Daily nung sub-editor Taorem Bishwajit Singh nem public health and hygiene reporting category atema sempet metedaktsüo.

Maneni, TOM TV nung staff reporter Khairibam Yaiphaba Meitei-i women and children, Sanaleibak Daily nung sub-editor Asem Chandrashekhwor Singh-i sports reporting, Sanaleibak Daily nung staff reporter Maibam Kenedy Singh-i art and culture &amp; parliamentary reporting sempet ana aser Sanaleibak Daily nungi staff

reporter Moirangthem Khagembä Meetei-i science and technology reporting atema sempet angutsü ta DIPR ajanga metedaktsüo.

2023 küm atema tetendangertem 'Best Editor Award on National Integration &amp; Communal Harmony' category atema nisung shinga meshimtsü lemtet kechiyong taküm iba telemsa nung nisung kati dang tenüng agütsü.

November 16 nü Chief Minister's Secretariat nung aliba Durbar Hall nung National Press Day amongdang sempettem agütsütsü.

**Manipur nung Meitei itsürtemi anir Ningol Chakouba mamonger****Imphal, November 15, 2023****(Agencies):** Manipur nung nisungtemi takoksa ajururtem pusema nungitba sayua Ningol Chakouba benjung mamongtsü lemtetogo.

Iba ya Manipur putiotsü nung mezungbuba lir aser Meitei nungeri parnok benjung tulutiba "Ningol Chakouba" nung shilem magitsü.

Lendenlen aliba nisungtemi iba benjungmong nung mener lungkak aittsü aser ibaji sorkari ajaki haihaura akaba lemtet ka magiba tejashi sayua agitsü.

Ningol Chakouba benjung ya Hiyangei (Meitei calendar)

aika parnoki meima alirtem taküm samaba atema nüktzü ayimer.

Manipur nung kin o kin mepetmesü aliba ajanga taküm Ningol Chakouba benjung mamongtsü lemtetogo.

Manipur nung tawa tasen tentetba Imagi Meira ta ser tetsür telok kati Mongulbarnü Ningol Chakouba mamongtsü ayongzüka liasü.

"

Manipur nung nisung aika timtemer. Adianutsür aser tetsütem aika pei talidak nungi meindokba sülen relief camps nung timtemer" ta Imagi Meira convenor Th Suajata-i ashi.

"Tetsütem aser adianutsür

"Ita 6 süiaka sorkari iba tebilemtsü mekoktetba atema asenok mepelaba sayudi. Sorkar tangatetba metetogo aser ibaji parnoki asenok lisopurtem tsüngda kati ka tepsettsü mulunger" ta laisa ashi.



MGNREGS kubok Mokokchung district atema 3rd Phase Social Audit District Level Public Hearing 15th Nov 2023 nü DRDA Conference Hall, Mokokchung nung takok ngua agir kulen telok kulemi tangokba noksa nung angur. Mokokchung district kubok item yimtsüngtem indang Social Audit agitsü - Aosettsü, Ungma, Mokokchung, Chuchuyimpang, Longmisa, Changtongya Old, Changtongya New, Yaongyimsen, Unger, Kilengmen, Akhola, Nukshiyim & Liroyimti. Sentong nung Seyieville Pfokri EAC Kubalong Independent Observer liasü. Nungshitola, Block Resource Person, NSSAA, SAU, Nagaland aser Imlirenla Sanglir, State Resource Person, NSSAA, SAU, Nagaland tenatia shilem agi. Mokokchung, 15th November, 2023

## Israel sepaitemi Gaza nung aliba al-Shifa Hospital meita aor

Gaza City, Yimpoksü/Nov. 15 (Agencies): Gaza City director of hospitals, Dr Munir al-Bursh-i ashi. Al-Shifa mozüki telung nung temeket nung anogo ishika kanga sashia raraba sülen Palestine nunger nisung meyirijang aika jenoka aliba iba mozüki ya Israel sepaitemi meita ao.

Israel mitkar temi al-Shifa nung tesem kar nung Hamas anema operation agir, ta Bodhbarnep shia liasü. Gaza nung mozüki tuluba amakba ya "targeted operation" lir aser ibai Israel aser United States itdangiter temi ashiba nung ajemdaker inyaker ta ashir.

Gaza nung yimsü asüba Hamas teloki iba mozüki nung parnok amenoka lir ta Israel-i aitsür. Hamas-i aji magizüker. Israel-i bilemba busemtsü kuli agüja mali.

Israel sepai aika iba mozüki telungi ait aser tanks tem iba ki temeket nung anentepa liasü, ta osangbener kati Khan Younis nungi ashi.

Iba inyakyim nung lendong lir, kechiaser mozüki telung nung shiranger, doctor aser pei ki yutsür arua jenoker densema Palestine nunger 7,500 shi lir, ta osangbeneri ashi.

Israel sepaitemi al-Shifa indang basement meita ao aser iba sülen surgical aser emergency buildings telungi ai, ta Gaza Strip nung general

jenoka lir aser Palestine nunger nisung 11,200 dak tema takum samaogo.

Israel nungeri al-Shifa mozüki temeket nung hopta aika maka arur. Israel sorkari iba tesem yutsür ainshitsü aiben metetdaktsüogo. Saka Palestinian medical ketdangsür temi mangar, kechiaser yangji shirangertem lir.

Israel sepaitemi meimchir, medical staff aser shiranger anema mapa tamajung inyaker, ta Palestinian Authority Health Minister Dr Mai al-Kaila-i sangdong ka nung ashi.

Mozüki amakba asoshi Hamas-i Israel aser US Tir Joe Biden aitsü.

Israel sepaitem al-Shifa mozüki telungi aiba asoshi süngmanger, ta United Nations aid chief Martin Griffiths-i ashi. "Mozüki ya rarakad tesem masü," ta pai X nung post asü.

Mitkartem al-Shifa Hospital telungi aiba osangtem ya tebilemtsü tulu lir, ta World Health Organization indang director-general Tedros Adhanom Ghebreyesus-ia X nung ashi.

International Committee of the Red Cross (ICRC)-ia shiranger, yirur aliba, medical staff aser civilian tem asoshi shisabolur aser parnok tem timtem magütsü mera agitsüla, ta ashi.

"Ibai kangasa tetsübotsü mapang lir. Mozüki nung pei tanur jenoka aliba civilian aser kinungertem asoshi tetsübotsü mapang lir. Shiranger anepaluba staff tem aser shirangertem asoshi tetsübotsü mapang lir," ta pai ashi.


Iba mozüki nung shirangr 700 shi lir aser yangji nisung 100 shi critical condition nung lir, ta Mokhallalati-i ashi. Yangi medical staff 1,000 dak tema mozüki yutsür moteti lir, saka mozü aser totzü maliba ajanga shiranger anepalu mesüteter.

Israel-i Gaza nung hopta pongu tashi bomb pokloktsüba ajanga civilian meyirijang aika pei ki yutsür tesem balala nung

## ARISHI KÜM 108 BUBA NUNG MERALOKER

Tsürabur Talikaba Longkumer arishi küm 107 (noklang ka ser tenet) tashi renteta takum tajung nung doktsüba asoshi atangji teyanglur Tsüngrem tenüng asanger. Pa ya Molungkimong yimdak tambusang lir.

Manení tanü November 16, 2023 anogo nungi tenzüka arishi küm 108 buba nung mejakloker aodang, anogo shia Tsüngrem leniba tashi nung anitsü asoshi chirnurtem aser semchisemnurtemi sarasademtsür.



## MOLUNGNEN O

"Kechiyong asenok taküm lira, asenok Kibuba atema taküm alir; aser asenok süra, asenok Kibuba atema asür. Anungji asenok süaka, mesüra taküm liaka, asenok Kibuba meyong."

Rom 14:8



ASÜR CHUBAMENLA

14.02.1960 - 08.11.2023

Temeim ojala, kinungtsü, amola, otsüla, jala aser adianu bilemtetba tenüng nung. Na kanga dang tesüngmangtsü tetsü ka liasü, shiba temeim, tashi aser mulungso aser aria bilemba onok mulung nung teti alitsü. Nü shisatsü aser anepasabyimya agi onok anogoshia manen ajungmesotsü. Onoki na kanga menungr aser tatem maka bilemtettsü.

Ozü asükuh mapang onok nongita yariba aser temeim sayuba den onok mulung anizüngüdaktsüba atema kanga dang pelaba lemsateper. Mangyim jashi mapang nenok temeim agi onok khuret tepungbabä kümdakja anisüngüdaktsüogo. La shiranga aliba mapang aser iba lima toktsü aoba anogo tashi medemer, kiyonger, temeimertem aser kinungertem kwina katisa onok nübü, rongsen, shisatsü aser sarasadem agi nongita yariogo, nenok ajak dang kanga pelar. Nenoki aria bilemtüba aser temeim sayuba ajanga iba mangyim jashi koktettsüa teyari agütsüogo. Tulusang Tsüngremi nenok ajak moajangma.

Temeimbatem.

ASEAN defence minister temi Myanmar mepetmesü aser Israel-Hamas rara anentsü ayongzük

Jakarta, Yimpoksü/ November 15 (Agencies): Southeast Asian defence ministers tem Bodhbarnü Jakarta nung senden ka amenba sülen parnoki Myanmar nung mepetmesü adoker aliba aser Hamas aser Israel na rara tembangdaktsütsü asoshi ayongzükogo.

Iba senden nung sensaksem ya timba Myanmar mepetmesü aser Israel o Hamas na rara indang liasü aser iba den ano South China Sea nung Beijing inyakyim tali kuma aoba indanga senaksemogo.

Muslim nunger timba aliba linük Indonesia tir Joko Widodo-i iba hopta US tir Joe Biden dang Gaza nung ceasefire benoktsü atema teyari agütsü mepeshia liasü.

Kasaji senden nung

Indonesia defence minister Prabowo Subianto-ia, Palestine nunger aliba tesem nung rara adoker aliba ajanga kanga temulung mepelai bilemer, ta ashi.

Malaysian Defence Minister Mohamad Hasan-ia yimjung asoshi ayongzükogo aser ashiba agi, Kuala Lumpur-i kiralongrar inyakyim aser civilian tem tepsetba aitsür.

"Taküm samaba, timtem tekangshi aser teraksatsüba ya anentsüla aser telok ajaki aremzüktepa inyaksangshitsü nüngdaker," ta pai ashi.

October 7 nü Hamas puri Israel maka nisung 1,200 shi tepset aser nisung 240 Gaza-i pur ao. Kasa mapang nung Gaza nung health ministry-i ashiba agi, Israel-i Gaza amak tenzükba sülen nisung 11,320 tepsetogo, kong tanur meyirejang aika densema lir.

(Maneni tapak 8 nung...)

**IT&C**

# TECHNOLOGY STARTUP COMPETITION 2023

**CASH PRIZES UPTO RS. 100,000 (ONE LAKH) TO BE WON**

**ELIGIBILITY**

- THE COMPETITION IS OPEN EXCLUSIVELY TO TECHNOLOGY STARTUPS BASED IN NAGALAND.
- THE DEADLINE FOR SUBMISSION IS 26<sup>TH</sup> NOVEMBER 2023

**APPLY NOW AT : INNOVATE.NAGALAND.GOV.IN**

Organized by the  
Department of Information Technology & Communication  
Government of Nagaland

## Cooch Behar Trophy atema Nagaland team sangdongogo



**Dimapur, Yimpoksüi/ November 15 (TYO):** Nagaland Cricket Association-i taruba Cooch Behar Trophy 2023 atema Nagaland U19 tebur team sangdongogo.

Iba asayamung league asaya ana Nagaland Cricket Stadium, Sovima nunga asayatsü asoshi renemdar.

### Team nung asayartem yamai alitsü:

1. Yugandhar Singh (C)
2. Jesevilie Dzeyie
3. Samir Ali
4. Seyievizo Zaputou
5. Vishal Sahani
6. Thupuluzo Lohe
7. Keneizetuo Rio
8. Rajesh Das

9. Anil Gupta
  10. Thepfusaho Zhale
  11. Jenithung Ezung
  12. Thechamo Odyuo
  13. Moatemu
  14. Neizolie Metha
  15. Lunthu martin
- Support staff:**  
Dziesevotuo John Belho - Team Manager & Asst. Coach  
Ameet S.N - Head Coach  
S&C- Sunil Kumar  
Physio- Neiphreto Yhokha  
Fixture:  
17th - 20th Nov. 2023: Nagaland vs Sikkim (Nagaland Cricket Stadium, Sovima)  
24th - 27th Nov. 2023: Nagaland vs Meghalaya (MCA Cricket Ground, Shillong)

1st- 4th Dec. 2023: Nagaland vs Manipur (Lal Bahadur Shastri Stadium, Anand, Gujarat)

8th - 11th Dec. 2023: Nagaland vs Mizoram (Nagaland Cricket Stadium, Sovima)

15th - 18th Dec. 2023: Nagaland vs Arunachal (Lal Bahadur Shastri Stadium, Anand, Gujarat).

Asayamung dak sendakba nung Nagaland Cricket Association-i state nung cricket asaya meimer ajak dang kidang asayatsü aliba asayatem arua repranga state team pusemtsü asoshi mepeshia metedaktsüogo.

## World Athlete of the Year Award atema Neeraj shimogo



**Yimpoksüi/November 15, 2023 (Agencies):** Olympic aser world champion javelin thrower Neeraj Chopra Mongolbarnü tebur 'World Athlete of the Year' award densemogo.

Arishi küm 25 tain India nunger asayar ya iba naröküm atema asayar pongu shimbä rongnung densema liasü.

Taküm pai kanga junga asaya World Championship title abenba aser Asian Games nung gold medal anguba densema takok tajung aika ngutetba sülen tang iba tetushi atema shimerem rongnung densemogo.

"Linük pezü aser association 4 nungi asayar pongu yagi 2023 küm athletics December 11 nü sangdongsü.

## Kohli-i ODI century 50 yanglua Sachin ajatetogo

**New Delhi, Yimpoksüi/ November 15 (Agencies):** India nunger nüngtugu cricket asayar Virat Kohli-i Bodhbarnü pa indang international career nung alizüng tulutiba ka tongteta ODI nung century nung 50 yangluogo.

Bodhbarnü Mumbai nung New Zealand den World Cup semi-final asayaba mapang pai iba century yanglua Sachin Tendulkar-i yanglur aliba record ajatetogo.

New Zealand den asayaba mapang Kohli-i ball 106 nung century yanglu, kong four 8 aser six ka azükba densema liasü.

Kohli-i iba otsü tasen ya over 42buba nung yanglua liasü. Pai kanga junga asayaba ajanga

team nem teyari tulu agüja India nunger batsmen temi ajak senteper run 397 yanglua liasü.

Kohli-i century yangluba ya ano kanga jaugrademtsüka liasü kechiyong pai Sachin-i yanglur aliba record ya Sachin tanur asüdang nungi asaya aruba yimti nung yanglua liasü.

Kohli tang agi World Cup pezübuba nung asayar aser pai tang mezüngbuba iba asayamung knock-out asaya ka nung century yangluogo.

Century yanglua otsü tasen yangluba den ano pai World Cup ka nung run timtiba yangluba record-a yangluogo. Iba record ya-a Sachin-i bener liasü.

Maneni Kohli-i, Australia

Ponting (13,704) ajateta ODI asaya nung run timtiba yangluba asayartem rongnung tasembuba kümogo. Pa Sachin (18,426) aser Sri Lanka nunger asayar Kumar Sangakkara (14,234) na sülen tasembuba jenjang nung lir.

2023 World Cup nung asayartem rongnung Kohli-i run timtiba yanglur lir. Pai tang tashi nung run 700 tera agi dang majung yanglur lir aser pa indang average 105 dak tema lir.

Taküm World Cup nung South Africa den asayaba mapang out mesüi run 101 aser Bangladesh den asayaba mapang out mesüi run 103 yangluba sülen Kohli-i tang agi tasembuba century yangluogo.

Tenüm Flyers nung Unger, Aonokpu aser Mopungchuket, Khensa, Yaongyimse, Yimjenkimong, Lakhuni aser Padampukhuri lir.

Tzüla Warriors nung Mongsenyimti, Chungtia, Asangma, Longkhum, Longkong, Anaki aser Unity Village lir.

Meikong Woodlands nung Süngratsü, Longmisa, Dibua, Changdang, Kelingmen, Chami, Changki aser Naga United lir.

Milak Rapids nung Longjang, Merangkong, Aliba, channel nung live sayur.

## ASUD 4 buba Autumn... (Tapak 1 nungi...)

Minister tem külém sangdong ka ajanga Myanmar nunger military lenirtem dang yimjung asoshi sentong yanglur alibatem ya benoka i nyaksangshitsü ayongzükogo.

2021 küm coup sülen yimjung asoshi onük pongu benoktsü mulungtepba sülen manidakba atema junta lenirtem ya iba bloc senden nung shilem magidaktsüi aradar.

Iba senden ya maneni Brehostibarnü amentsü kong United States, China, Japan, South Korea, India, Australia aser Russia nungi lenirtemia shilem agitsü.

## BILEMDANGANG

"Tamagitsü o aika jembiba dang nungbo mejembi tajungba."



'Innovative program' kubok 'Rural Sports Meet' ta sur Ongpangkong South Block pur asoshi GHS Mangmetong nung ayongzüka kaogo. Iba sentong ya Dept of Youth Resources & Sports Govt. of Nagaland-i teyari agüja ayongzük. Asayamung sentong nung school pezüi shilem agi. Kethosithou Sekhose NCS, Director, Youth Resources & Sports aser Mokokchung DSO, Anguvito Sema nati iba sentong nung tongti shilem agia lanurtem ajungshia liasü. Iba asayamung nung GHS Longkhum-i tematiba jenjang nguteta liasü. Mokokchung, 15th November, 2023.